

No. Soalan : 57
PR-1333-L71307

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : **JAWAB LISAN**

DARIPADA : **DATO SRI DR. MUHAMMAD LEO MICHAEL
TOYAD ABDULLAH
[MUKAH]**

TARIKH : **22 MAC 2016**

SOALAN : **Dato Sri Dr. Muhammad Leo Michael
Toyad Abdullah [Mukah] minta **MENTERI
LUAR NEGERI** menyatakan perubahan dari
perhubungan Amerika Syarikat dengan
Negara Anggota ASEAN semenjak Malaysia
mengetuai dialog antara kedua benua ini.**

JAWAPAN

Tuan Yang di Pertua,

Saya ingin mengucapkan terima kasih kepada Yang Berhormat Mukah atas soalan beliau.

2. Untuk makluman Dewan yang mulia ini, Malaysia mengambil alih tugas sebagai negara penyelaras hubungan dialog ASEAN-Amerika Syarikat daripada Myanmar pada Ogos 2015 selepas mesyuarat Pasca-Persidangan Menteri-Menteri Luar Negeri ASEAN dengan Amerika Syarikat di Kuala Lumpur.
3. Hubungan dialog ASEAN dan Amerika Syarikat kini berada pada tahap yang amat baik dengan kerjasama di dalam pelbagai bidang berkepentingan bersama termasuk politik-keselamatan, ekonomi dan sosio-budaya. Malaysia telah memainkan peranan yang penting sebagai negara penyelaras dalam mengemudi dan menetapkan arah tuju hubungan dialog ASEAN-Amerika Syarikat di landasan yang memberi faedah kepada ASEAN.
4. Hubungan dialog ini telah diperkuuh lagi apabila ia dinaik taraf ke perkongsian strategik semasa Sidang Kemuncak ASEAN-Amerika Syarikat Ketiga di Kuala Lumpur pada 21 November 2015. Semasa Sidang Kemuncak tersebut juga, para pemimpin telah memperakukan *Joint Statement on ASEAN-U.S. Strategic Partnership* dan *Plan of Action to Implement ASEAN-U.S. Strategic Partnership*, dengan izin, yang

menggariskan lima bidang utama kerjasama dalam tiga tonggak Komuniti ASEAN seperti integrasi ekonomi, kerjasama maritim, cabaran merentas sempadan termasuk perubahan iklim, kemunculan pemimpin baru (*emerging leaders*) dan peluang wanita (*women opportunities*).

Tuan Yang di-Pertua,

5. Baru-baru ini, para Pemimpin ASEAN dan Amerika Syarikat telah bertemu di Sunnylands, California, Amerika Syarikat pada 15-16 Februari 2016 bagi menghadiri Sidang Kemuncak Pemimpin Amerika Syarikat-ASEAN atas jemputan Presiden Barack Obama semasa Sidang Kemuncak ASEAN-Amerika Syarikat Ketiga di Kuala Lumpur pada 21 November 2016.

6. Sidang Kemuncak tersebut berlangsung dengan produktif dan amat signifikan. Presiden Obama menyifatkan Sidang Kemuncak Amerika-ASEAN yang julung kalinya diadakan di Amerika Syarikat ini mencerminkan komitmen peribadinya serta komitmen negara Amerika Syarikat dalam memperkuuhkan perkongsian strategik dengan ASEAN. Selain itu, Presiden Obama juga menyatakan ketetapan Amerika Syarikat untuk meneruskan dasar tumpuan (*rebalance*) di rantau Asia dan meyakinkan bahawa dasar tumpuan (*rebalance*) ini bukanlah bersifat sementara dan akan terus menjadi tumpuan Amerika Syarikat pada masa hadapan.

7. Sidang Kemuncak ASEAN-Amerika Syarikat ini juga adalah signifikan kerana ianya dilihat sebagai satu pengiktirafan oleh Amerika Syarikat kepada peranan yang dimainkan oleh ASEAN di peringkat serantau maupun global. Selain itu, dengan ekonomi yang berjumlah USD2.4 trillion, jumlah penduduk seramai 630 juta serta golongan pertengahan yang sedang rancak berkembang, ASEAN dilihat sebagai memiliki potensi yang besar untuk terus maju ke hadapan. Dalam konteks ini, ASEAN dan Amerika Syarikat adalah berada dalam kedudukan yang terbaik untuk memperkuuhkan kerjasama serta membuka haluan ke arah keamanan, kestabilan dan kesejahteraan rantau Asia Tenggara.

8. Di akhir Sidang Kemuncak tersebut, para Pemimpin memperakukan *Joint Statement of the ASEAN-U.S. Special Leaders' Summit: Sunnylands Declaration*. Sebagai negara penyelaras untuk hubungan dialog ASEAN-Amerika Syarikat, Malaysia telah memainkan peranan yang penting terutamanya dalam mendapatkan persetujuan semua negara anggota ASEAN dan Amerika Syarikat mengenai dokumen tersebut.

Sekian, terima kasih.

SOALAN (58)

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

**TARIKH : 22 MAC 2016
[SELASA]**

**DARIPADA : Y.B. TUAN CHUA TIAN CHIANG @ TIAN CHUA
[BATU]**

SOALAN :-

Y.B. TUAN CHUA TIAN CHIANG @ TIAN CHUA [BATU] minta MENTERI KESEJAHTERAAN BANDAR, PERUMAHAN DAN KERAJAAN TEMPATAN menyatakan memandangkan suasana ekonomi yang makin buruk, ramai warga ibu kota dijangka akan hilang perkerjaan atau pendapatan tetap, apakah rancangan Kementerian untuk membantu mereka terutamanya mereka yang menetap di flat PPR.

JAWAPAN :-

Tuan Yang di-Pertua,

Untuk makluman Ahli Yang Berhormat, memandangkan suasana ekonomi yang semakin buruk di mana ramai warga ibu kota dijangka akan hilang pekerjaan atau pendapatan tetap, terutamanya mereka yang menetap di flat PPR, maka di bawah RMKe-11 terdapat tiga (3) program di bawah Kementerian Kesejahteraan Bandar, Perumahan dan Kerajaan Tempatan (KPKT) yang bermatlamat untuk membantu golongan ini untuk menjana pendapatan atau meringankan beban kewangan mereka iaitu:

- a) Program AZAM Bandar;
- b) Program Kios Penjaja Bandar; dan
- c) Program Titipan Kasih (*Food Basket*).

Program AZAM Bandar yang juga dikenali sebagai Program Latihan Kemahiran dan Keusahawanan (PLKK) adalah bertujuan untuk memberi latihan keusahawanan kepada Ketua Isi Rumah (KIR) atau Ahli Isi Rumah (AIR) di bandar yang termasuk di dalam Kumpulan Berpendapatan 40% Terendah (B40). Kriteria yang ditetapkan bagi menyertai program ini adalah seperti berikut:

- i. KIR / AIR bandar yang berdaftar dan disahkan status dalam eKasih;
- ii. KIR / AIR berumur diantara 18 hingga 60 tahun;
- iii. AIR yang tidak disenaraikan dalam eKasih tetapi telah menetap bersama KIR melebihi 6 bulan boleh dipertimbangkan dengan syarat mendapat kelulusan KPKT terlebih dahulu; dan
- iv. AIR yang sedang belajar di IPT adalah tidak layak mengikuti PLKK.

Skop latihan program PLKK adalah merangkumi pakej berikut :

- i. Program Pembangunan Minda Insan - bertujuan untuk meningkatkan jati diri kumpulan sasar, mengubah minda supaya lebih positif dan terbuka kepada perubahan;
- ii. Program Bina Upaya - bertujuan untuk meningkatkan kemahiran kumpulan sasar supaya mampu mengusahakan perniagaan yang boleh menjana pendapatan yang lebih tinggi. Terdiri daripada modul kemahiran dan keusahawanan (mengikut jenis bidang); dan
- iii. Program Jana Pendapatan Melalui Keusahawanan - untuk menggalakkan penyertaan kumpulan sasar dalam projek-projek keusahawanan / kemahiran bagi membolehkan mereka menjana pendapatan dan meningkatkan kualiti hidup.

Pelaksanaan PLKK adalah dengan kerjasama Badan Bukan Kerajaan (NGO) dimana peserta akan dibekalkan dengan peralatan-peralatan untuk memulakan perniagaan berdasarkan minat dan latihan yang telah diterima semasa menyertai program. Pemantauan secara berkala turut dilaksanakan terhadap peserta yang telah menerima peralatan bagi memastikan mereka memulakan perniagaan dan seterusnya menjana pendapatan hasil daripada menyertai program. Dengan latihan dan peralatan yang telah diterima serta pemantauan yang dilaksanakan, para peserta program dijangka akan dapat menjana pendapatan tambahan dan seterusnya meningkatkan kualiti hidup masing-masing selaras dengan objektif program ini.

Manakala **Program Kios Penjaja Bandar** adalah bertujuan untuk membantu golongan miskin bandar menjana pendapatan tambahan. Matlamat program ini adalah untuk menggalakkan penyertaan Kumpulan B40 dalam projek-projek keusahawanan bagi membolehkan mereka menjana pendapatan dan meningkatkan kualiti hidup. Program ini juga berhasrat untuk mengurangkan beban Kumpulan B40 di bandar untuk mendapatkan Kios Penjaja yang selesa dan selamat bagi menambah pendapatan. Kriteria kelayakan penerima Kios Penjaja Bandar adalah

seperti berikut :

- i. KIR yang telah disahkan status kemiskinan dalam Sistem eKasih sama ada miskin tegar / miskin / mudah miskin / B40 sahaja;
- ii. Bagi yang tidak berdaftar dalam eKasih, KIR hendaklah disahkan dalam Mesyuarat Focus Group Pembasmian Kemiskinan Peringkat Negeri atau Daerah.
- iii. KIR berumur di antara 25 – 60 tahun (umur produktif) iaitu:
 - a. Tidak uzur dan mampu bekerja untuk menyara keluarga;
 - b. Telah tamat persekolahan; dan
 - c. Berminat dan berazam untuk menjalani program yang dipohon.
- iv. Pendapatan isi rumah RM3,860 dan ke bawah sebulan; dan
- v. Tidak muflis

Peserta yang terlibat dengan program ini akan dibekalkan dengan sebuah kios penjaja bersama peralatan-peralatan untuk bermiaga. Peserta juga turut diberikan kursus motivasi sebelum menerima kios bagi meningkatkan lagi keyakinan peserta untuk menjalankan perniagaan dan seterusnya mengubah kualiti hidup mereka.

Program Titipan Kasih (*Food Basket*) pula bertujuan untuk membantu mengurangkan beban kewangan keluarga terlibat melalui pemberian RM80.00 sebulan yang dikreditkan dalam MyKad. Melalui bantuan ini, Ketua Isi Rumah yang layak menerimanya boleh membuat pembelian barang-barang kepeluan asas di kedai-kedai terpilih yang berdaftar. Kriteria penerima bantuan *Food Basket* ialah:

- i. Tersenarai sebagai Miskin Tegar dalam sistem e-Kasih
- ii. KIR berusia 60 tahun ke bawah
- iii. Bilangan Ahli Isi Rumah (AIR) 5 orang ke atas
- iv. Pendapatan perkapita RM120 ke bawah, dan
- v. Menetap di kawasan operasi PBT

Kementerian Kesejahteraan Bandar,
Perumahan dan Kerajaan Tempatan

Mac 2016